

# JONINU

## BOTAI OWAWA

### *Wiroeta sina*

<sup>1</sup> Yesu Kerisoba webene iba owawa ue odaisi. Yanu sina webero nauawe. Boderewere, Godima ane ane nesia ubu ui, i kowaro Dawa ibi. Dawa ibebe nono Ba Eme Sini. Ba Eme Siniro Danu sina naue, Dawa ere, Dawa agema burie, enoma enoma usiba iba Dawaba yabai waisi. <sup>2</sup> Dawana i wiroetanu ubi. Dawana Godinu sina. I sinana Ba Eme Sini. Ba Eme Siniro yana esite iba yaba i sina waisi. I wiroetana Godibai ibebe nono Ba Eme Siniro esi. <sup>3</sup> Dawa esite Danu sina nausiba yaba waisi. Ya uwaraini yaini Godibai uruama owiga ufene iba waisi. Yana Godini Danu Amaraini owiga utaisi, i ari ya uwaraini yaini Godibai owiga ufeisi. <sup>4</sup> Ya uwaraini yaini yaru uegou ufene iba owawa ue odaisi.

### *Ya nesia arioro inareibi*

<sup>5-7</sup> Yesuma ewa sina weiro nausiba iba i sina yaba eno waisi, Godi Dana ario ari. Dawabai dumu me. Nono Godini yaini owiga utaisi waisina dumu ariro inaraisiro yana meo weda meo utaisi. Godina arioro ibinuba yana i arioro inareda Dawaini owiga ba uruama utaisi. Eno utaisiro Godinu Amara Yesu Kerisonu ononoma yanu ba me ueta nesia urotebasu.

<sup>8</sup> Yanu neno ubarero ba me ibawa waisina yanu torowa iruteda iba ba sina ya iwata me. <sup>9-10</sup> Yanu ba me ueta we ma boroyafeisina Godi Dawa nesia

rorowarau utasuba ya da ekodifite ba me ueta nesia mubite imutawa uteda i ba me ueta urotebiro roatarau ibifeisi. Godima eno wasu, eme nesia ba me utaita wasuro nono yana ba me utawa webeisina Godi Dawa meo wasu webeisi. Eno weda Danu sina nenoma da imufero Danu sina yabai da ibifisu waisi.

## 2

### *Yesu Kerisona yanu durua ueta*

<sup>1</sup> Nanu aruma amara, yana ba me ueta da ufoe iba ewa sina owawa ue odatane. Nono anama ba me ufisuna yanu abanaro inare sina weta Amara ibinu. Dawana i rorowarau utasu Yesu Keriso. Dawa yabairoma Godibai sina webisu. <sup>2</sup> Yesu Danu aikana yanu ba me ueta mune aika odasuro Godima ereda ina ido wasu. Nono yanu ba me ueta torowana me, i orofa atata uwara nesianu ba me ueta mune aika odifie iba korosiro ui.

<sup>3</sup> Danu we kakara ueta sina nautaisite enanari utaisina Dawa imuegou utaisi. <sup>4</sup> Anama Dawa na iwata utatane webite nono Danu sina da mubisuna dawana meo bobo amara, dawabai ba sina me. <sup>5</sup> Anama Godinu sina nautasuna ya iwata, dawa Godi imuteda ba neno arama uegou utasu. Yana enanari utaisina ya iwata yana Godinu uwara sinaisi. <sup>6</sup> Anama nana Godibai ibatane wasuna Yesunu ueta sineta ari enanari ufiwatane.

### *Anama domayamutuba neno arama utasuna Godinu arioro ibinu*

<sup>7</sup> Nanu aruma amara, yaba reka buna sina owawa odawa utatane. Ewa buna sina boderewereroma yabai ibinu. Ewa buna sina nesia bodere

nauta. <sup>8</sup> Ewana reka uetanu reka tarawatu sina owawa ue odatane. I sinanu ba ubi Yesu Kerisoro ereda yabai eraisi. Enoba i dumu ido me sibie utasuro i ario ido farasu.

<sup>9</sup> Anama nana i arioro inaratane weda nono danu domayamutuba neno ka utasuna dawana dumuro ibeta amara. <sup>10</sup> Anama danu domayamutuba neno arama utasuna dawa i arioro inarasuba siosawere da ufisu. <sup>11</sup> Anama neno siosa uteda domayamutuba neno ka utasuna dumu torowa ibinuba dumuro inarasuro dumuma danu diti garari utasuba i kobere ario daba iwawa utasu.

<sup>12</sup> Nanu aruma amara, Godima Yesuba yanu neno neno ueta mune imutawa uiba iba owawa ue odatane. <sup>13</sup> Ya dera uwarama, Yesu i boderewereroma ibinu Amara iwata utaitaba yaba owawa ue odatane. Ya reka uwarama i siosawere amara serigari utaba yaba owawa ue odatane. <sup>14</sup> Ya koiniboroma Baba Godi iwata utaitaba yaba owawa ue odatane. Ya dera uwarama i botai kowaro ibebe awona ibinu Amara iwata utaitaba yaba owawa ue odatane. Ya reka uwarama buna uteda i siosawere amara serigari utaitaba Godinu sina yanu nenoro ibinu. Yaba owawa ue odatane.

### *Yanu unu ewa nasiniro torowa da imufe*

<sup>15</sup> Ewa siosawere orofa atatanu imueta da imu-  
foro! Anama ewa orofa atatanu imueta nenoma  
imuegou ufisuna dawa Godi da imuegou ufisu.

<sup>16</sup> Ewa orofa atatanu imuetana eno, neno uyareta,  
ditima sasae ueta, eme emanu torowa ma der-  
awere ueta, i nesia ewa orofa atatanu imueta. Ina  
Godinu imueta me. <sup>17</sup> Ewa orofa atataini danu  
siosawere ibaiabai me sibiro nono Godinu imueta  
imutasu amarama me ibene ibene ibifisu. |L

*Yesu Kerisoba wasai utaita uwara*

<sup>18</sup> Nanu aruma amara, i dubu kowa fafie utasu. Wasai keriso fafisu sina nauta. Awonana wasai keriso faiyawere faraitaba i dubu kowa ido fafie utasu iwata utaisi. <sup>19</sup> I wasai keriso uwarama yabairoma anita. I uwarana yanu naueta uwara me. Emana aika uwara. I uwarana yanu naueta uwararona yabai ibifitae, meba yabairoma anitaba uwara nesia yanu ba uwara me iwata utaita. <sup>20</sup> Yana i uwara ari me. Godinu Imumu Kotofuma yabai tare ibinuba i ba sina nesia iwata utaita. <sup>21</sup> Yana ba sina iwawa utaita aba iwata utaita? Ina iwata utaitate Godinu imuetana meo me, ina ba iwata utaitaba iba yaba owawa ue odatane.

<sup>22-23</sup> Anama botai meo bobo amara? Anama Yesu Dawana Keriso me wasuna dawana botai meo bobo amara ido. Dawa eno ufisuna dawa Baba Godini Danu Amaraini imutawa utedaba dawana wasai keriso. Anama Godinu Amara na imutatane wasuna Godi imutasu. |L

*Imumu Kotofuma ba sina yaba we mawetu utasu*

<sup>24</sup> Enoba yanu botai nauta sina nenoma imuegou uawe. I sina yanu nenoro ibegou ufisuna yana Godinu Amaraini Godibai ibifoita. <sup>25</sup> Yesuma i me ibene ibene ibeta yaba mafisu eno we bou ui.

<sup>26</sup> I irueta uwaraba yabai we kakara umane iba owawa ue odataneba ido me sininu. <sup>27</sup> Godima Danu Imumu Kotofu siaia uiro yabai tare ibinuba moana uwarama ya da we mawetu ufitaita. Godinu Imumu Kotofuma ya nesia meo me, ba we mawetu utasu. Eno we mawetu utasuba Dawabai ibegou uawe.

<sup>28</sup> Nanu aruma amara Yesubai ibegou uforo Yesu ido fafisuna maru da ufote iya da uyafote Danu iboro rorowarau inafaota. <sup>29</sup> Yesu Keriso Dawana kobererau. Idoba ana anama kobererau utaitana emana Godinu adarabu.

### 3

#### *Awona yana Godinu koiniboro*

<sup>1</sup> Godima yaba neno arama derawere uegou utasuba imuegou uawe. Godima ya Nanu aruma amara wasuba ido yana Danu koiniboro. I orofa atata Godinu sina nautawa uwara, emana Godi iwata meba iba ya iwawa utaita. <sup>2</sup> Nanu uwara yaba watane. Awonana yaini naini yana Godinu koiniboro. Duburo ane ari sibeisina yaini naini ya iwata me. Nono duburo Yesu fafisuna Dawa ereda Dawa ari sibeisi. <sup>3</sup> Idoba anama Dawa eno imutasuna danu ba me ueta kodasute Yesubai ba me uetana meba Danu imuetana roatarau Dawa ari kobererau imuegou utasu.

<sup>4</sup> Anama ba me utasuna Godinu sina ma siosa utasu. Anama Godinu sina ma arama utasuna dawa ba me utasu. <sup>5</sup> Yesuma yanu ba me ueta mubie iba Ba Eme Sini. Dawa Ba Eme Sinite ba me utawa kobererau ibebi. <sup>6</sup> Anama Yesubai ibeda dawa ba me utawa utasu. Anama ba me utasuna Yesu erawa uteda dawa Yesu iwata meba iba daido ba me utasu.

<sup>7</sup> Nanu aruma amara, moana uwarama ya irufitae fafitaitana emanu sina da nauawe. Anama kobererau utasuna dawana kobererau, danu kobere uetana Yesunu kobererau ueta ari. <sup>8</sup> Anama ba me utasuna danu damamana seitani. Seitanima i botai kowaroma daido ba me ue arasu. Godinu Amarama seitaninu ba me ueta mu sabie iba ewaro tarari.

<sup>9</sup> Godima ana amara munasuro dawa ba me utawa utasu. Godinu imueta dawabai ibasuro Godima dawa munasuba dawa ba me utawa utasu. <sup>10</sup> Enoba Godinu uwara abodo iwata utaitate seitaninu uwara abodo iwata utaita. Anama ba me utasuna dawa Godinu amara me. Anama danu domayaba neno arama utawa utasuna dawa Godinu amara me.

*Naiyemutuba neno arama ueta sina*

<sup>11</sup> Ewa sina, ya neno arama ue matawe, i sina bodereroma nautebaita. <sup>12</sup> Yana Keini ari me. Keinina seitaninu amara. Keinima danu dabue uriro ui. Aneba danu dabuenu nodo turi? Keininu uetana ba mewerero danu dabuenu uetana kobererauba iba danu nodo turiro ui.

<sup>13</sup> Nanu uwara yaba watane. I orofa atata Godinu sina nautawa uwarama ya neno ka utaitaba da imuforo. <sup>14</sup> Yanu naiyemutuba neno arama utaisiba uieta ekoisite fare i me ibetaro ibinisi. Ina ya iwata utaisi. Anama danu domayaba neno arama utawa utasuna dawa i uietaro ibinu. <sup>15</sup> Anama danu domayaba neno ka utasuna dawa me uieta amara. Imue eawe! I eme ma uieta uwarama Godibai me ibene ibene da ane ibifitaita. <sup>16</sup> Yesuma yaba neno arama uite tare ui. Eno uiba Danu neno arama uetana derawere iwata utaisi. Enoba yaini naini yanu naiyemutuba enanari neno arama ufete uifeisi. <sup>17</sup> Anabai ibaiabai faiyawere ibasuro dana mui ibaiabai me aramawere amara erasute neno kimu uteda matawa utasuna Godinu neno arama ueta dawabai meba iba eno utasu. <sup>18</sup> Nanu aruma amara, neno arama ueta sina torowa da webete nono ba neno arama uegou ufe.

*Naueta amarama dawa Godinu iboro iyarawa*

<sup>19</sup> Yana ba ufeisina yana Godinu uwara iwata ufete Godibai inafeisina maru da sibeisi. <sup>20</sup> Yaini naini nenoma ya siosawere uwara torowa imutaisina yanu nenona kikiraturo Godi Dawana derawere. Dawu nesia iwata utasuba yanu nenoma imuetaba iya uyarawa uteda Godi imuegou utaisi.

<sup>21-22</sup> Nanu uwara yaba watane. Yaini naini nenoma ya siosawere imutawa utaisina Godibai iyarawa anaisite Danu wasu sina enanari utaisite ane ane wenaueraisina Dana ya kobererau imuteda ina yaba matasu. <sup>23</sup> Godinu wasu sina eno, yanu neno Danu Amara Yesu Kerisobai ibifiro Dawu imufete ya neno arama ue matafe, Dawu eno yaba wasu. <sup>24</sup> Danu wasu sina enanari utaisina Dawabai ibaisiro Dawu yabai ibasu. Danu yabai ibetana anene iwata ufeisi? Dawu Danu Imumu Kotofu siaia uiro yanu neno ubarero tare ibinuba iba iwata utaisi.

## 4

### *Ba Godinu Imumuini seitandinu me sara imumu*

<sup>1</sup> Nanu uwara, nanu neno yabai ibinu. Moana uwaranu sina da nauawe! I uwarama waita, Godinu Imumu yabai ibinu waitana ba me. Enoba imue eawe! I emabai ibinu imumu ue eawe. Ina Godibairoma fari aba me? <sup>2</sup> Godinu Imumu Kotofu bobo uwara anene imutaita? Godinu Imumu Kotofu bobo uwarama waita, Godinu Amara Yesu Keriso, Dawu Ba Eme Sini waitaba emanu sina Godibairoma fari ya iwata utaita. <sup>3</sup> Godinu Imumu Kotofu me uwarama eno waita, Godinu Amara Yesu Keriso Dawu ba eme sinawa waitaba emanu sinana Godibairoma farawa ui. I imuetana wasai kerisonu imueta. Wasai kerisonu

imueta wenero nauita. Ina ewa orofaro ido fare ibinu.

<sup>4</sup> Nanu aruma amara, yana Godinu uwaraba i Godinu sina nautawa irueta sina waita uwara serigari utaita. I yabai ibinu Imumu Dana derawere. I emabai ibinu imumu dana kikiratu iba yana ema serigari utaita. <sup>5</sup> I uwarana ewa orofa atata uwaraba i Godinu sina nautawa uwarama emanu sina nautaita. <sup>6</sup> Nono yaini naini yana Godinu uwaraba Godinu sina nautaita uwarama yanu sina nautaitaro Godinu sina nautawa uwarama yanu sina nautawa utaita. I uwarama eno utaitaba i Kotofu Imumu bobo uwaraini i seitaninu siosa imumu bobo uwaraini yana iwata utaisi.

### *Godi Dawana neno arama uetanu ubi*

<sup>7</sup> Nanu uwara yana neno arama ue matafene watane. I ba neno arama ueta Godibairoma fariba iba neno arama ufeisi. <sup>8</sup> Anama neno arama utasuna dawana Godinu amara. Dana Godi iwata utasu. Ana anama neno arama utawa utaitana ema Godi iwata me. <sup>9</sup> Godima neno arama uegou utasu. Godima Danu Amara yaba tare uifiro yana me ibene ibene ibifene iba ewa orofaro siaia uiro tarari. Godima eno uiba Danu ba neno arama ueta yaba ma boroyari. <sup>10</sup> Yana Godiba neno arama uegou utawa utaisiro Dana yaba neno arama uegou utasu. I ba neno arama uetana eno, Dawa Danu Amara yanu ba me ueta nesia mubie iba Yesu siaia uiro ewaro tarari. <sup>11</sup> Nanu uwara, Godima yaba eno neno arama uegou uiba yaini naini enanari neno arama uegou ufene watane. <sup>12</sup> Ya nesia Godi erawa nono yana neno arama ue matanaisina Godima yanu neno ubarero ibinu.



Ibinuba Danu neno arama ueta ari neno arama kobererau uegou utaisi.

<sup>13</sup> Godima Danu Imumu Kotofu siaia uiro tare yabai ibinu. Enoya ya iwata utaisi, Godima yabai ibinuro yana Dawabai ibinisi iwata utaisi.

<sup>14</sup> Godima Danu Amara ewa orofa atata uwara nesia ma wirofie iba siaia uiro tarari. Dawa tarariro esiba iba yaba waisi. <sup>15</sup> Anama Yesu Dawa Godinu Amara wasuna Godima i amaranu neno ubarero ibinuro dawa Godibai ibinu. <sup>16</sup> Enoya Godinu yaba neno arama uetana ya iwata uteda imuegou utaisi. Godima neno arama uegou utasu. Dana ba neno arama ueta. Anama uwaraba neno arama utasuna dawa Godibai ibasuro Godima danu neno ubarero ibasuro.

<sup>17</sup> Godima yanu neno ubarero ibinuba uwaraba neno arama uegou utaisi. Eno utaisiba Godinu koto kowa fafiro Dawaba iya da uyafeisi. Ewa orofaro Dawa ari ibinisiba Danu koto kowa fafiro Dawaba iya da uyafeisi. <sup>18</sup> Yana ba neno arama uegou utaisina iyarawa utaisi. Ba neno arama uegou uteda iyareta mu sanaisi. Yana iya uyaredana Godi imuegou utawa iba iya uyaraishi. Godima ya fanisi mafisu aba me? Eno imuteda iba iya uyaraishi. Anama eno utasuna dawa Godinu neno arama ueta imuegou utawa utasu. <sup>19</sup> Dana yaba botai neno arama utasuba nono yana Dawaba neno arama utaisi. Ina imuegou uawe. <sup>20</sup> Anama na Godiba neno arama utatane weda nono danu domayaba neno ka utasuna dawana meo bobo amara. Ido anene anama Godi erawa uteda neno arama utasude nono danu domaya erasute neno arama utawa utasuna dawa Godiba neno arama utawa utasu. <sup>21</sup> Yesuma eno bunawere wasu, ana Godi neno arama utasuna anu aiye neno arama

ua wasu.

## 5

*Naueta amarama nasininu ueta siosa serigari utasu*

<sup>1</sup> Anama Yesu Dawana i Keriso imutasuna i naueta amara dawana Godinu amara. Enoba anama mui dera amaraba neno arama utedana i amara danu aruma amaraba enanari neno arama utebasu. I arina anama Baba Godiba neno arama utasuna Danu Amara Yesu Kerisoba neno arama utasu. <sup>2</sup> Yana Godiba neno arama uteda Danu wasu sina nautaisite utaisina ya iwata utaisi, ina Danu uwaraba enanari neno arama utaisi. <sup>3</sup> Anama Godiba neno arama utasuna dawa Godinu wasu sina nesia nauegou utasu. Enoba yabaina Godinu sina urumu me. <sup>4</sup> Urumu meba Godibairoma fareta uwara, Danu sina naueta uwarama ewa orofa atatanu ba mewere ueta sineta serigari utaisi. Yesu Keriso imuegou utaisina i siosawere ueta sineta serigari utaisi. <sup>5</sup> Anama Yesu Keriso Dawa Godinu Amara imutasuna dawa ewa orofa atatanu ueta sineta ba mewere serigari utasu.

*Godima Danu Amaranu sina ma wabararo uegou ui*

<sup>6</sup> Yesu Keriso Dawa ewa orofaro babataito ufitte me ibifiro Danu onono itafiro uifie iba tarari. Dawa babataito torowa ufie farawa ui. Dawa babataito ufiro Danu onono itafie iba tarari. Godinu Imumu Kotofuma i Yesuba sina wasu. Godinu Imumu Kotofu Dawana ba iba ba wasu. <sup>7-8</sup> Yesunu babataito uetaini Danu onono itaretaini Godinu Imumu Kotofunu wetaini i rarogonuma sina demurai waita. Ema eno waita, Yesu Keriso Dawa Godinu Amara waita. <sup>9</sup> Yana emenu waita sina

nautaisi. Nono Godinu wasu sinana derawere emenu waita sinana kikiratu. Godima wei, Yesu Keriso Dawa Nanu Amara weiba ya nauegou utaisi. <sup>10</sup> Anama Godinu Amara Yesu imuegou utasuna Godinu ba sina danu neno ubarero ibinu. Anama Godinu sina nautawa utasuna dawa Godi meo bobo wasu. Godima Yesu Dawa Nanu Amara weirogo i amarama dawa nautawa uteda Godi Dawa meo bobo wasu. <sup>11</sup> Godinu sina ane ari? Danu sinana eno, Nanu Amara ubi yabai siaia umaro tarafite yaba uifiro me ibene ibene ibifoe watane, Danu sina eno wei. <sup>12</sup> Anama Yesu Keriso imuegou utasuna Godinu wiroetaini me ibene ibene ibetaini awona dawabai ibinu. Anama Yesu Keriso imutawa utasuna Godinu wiroetaini me ibene ibene ibeta dawabai me.

*Ya iwata yana wiroeta me ibene ibene ibifeisi*

<sup>13</sup> Godinu me ibene ibene yabai ibinu imuegou ufoe iba ya Godinu sina nautaita uwaraba ewa owawa ue odatane. <sup>14</sup> Yana Godinu imueta imuteda ane ane Dawabai wenaueraisina Dawa nautasu. Ina imuegou utaisi. <sup>15</sup> Godima yanu wenauereta nautasuba Dawa nesia yaba matasu. Ina ya iwata utaisi.

<sup>16</sup> Yana eraitana Godinu mui naueta amarama ba me utasuro eraita. Eraitana danu ba me uetana uieta dabaro aneta me iba Godibai guriguri uawero Godima i amara ma wirofi. Nono moana uwaranu ba me uetana uieta dabaro aneta iba Godibai guriguri da ufoe watane. <sup>17</sup> Ba me ueta nesiana siosawere Godima wasu. Nono moana ba me ueta Godima mune imutawa ufishu. Mui ba me ueta siosawereba Godima i da mubisu. <sup>18</sup> Godibairoma faraita uwara ema ba me utawa utebaita. Godinu Amara Yesu Dawa Godinu

uwara durua utasuba seitanima i uwara agema buritawa utebasu.

<sup>19</sup> Ya Godibairoma fasi yana iwata utaisi. Nono i orofa atata Godinu sina nautawa uwarana seitanibai ibinita. <sup>20</sup> Godinu Amarama ewaro tararite yaba iwata derawere mateda Dawa iwata

ufene iba tarari. Yana i ba Amara, Godinu Amara Yesu Kerisobai ibinisi. Ewa Yesu Keriso Dawana Godi. Ewa wiroetana me ibene ibene ibeta. Ina nesia ya iwata utaisi.

<sup>21</sup> Nanu Aruma Amara, i ba me godi nesia kodiawe. Nanu sina ido me sininu.

**Yareba Nupela Testamen**  
**The New Testament in the Yareba Language of Papua**  
**New Guinea**  
**Nupela Testamen long tokples Yareba long Niugini**

Copyright © 1987 Wycliffe Bible Translators, Inc.

Language: Yareba

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

---

PDF generated using Haiola and XeLaTeX on 13 Jul 2024 from source files dated 31 Aug 2023

1e9160cd-d458-5f88-93ab-67ad89ccc27c